

法政大学学術機関リポジトリ

HOSEI UNIVERSITY REPOSITORY

PDF issue: 2024-09-03

0040文抄

文抄

三
月
刊

上諭給事中劉毓楠奏。敬陳管見一摺。據稱議政王自任
事以來。日與軍機大臣等講求治道。夙夜在公。可謂勤
勞備至。但性量固著其寬宏。而風度尤期於嚴肅。在王
大臣等。虛懷納德。下士禮賢。原冀博訪周諮。洞悉天下
利弊。以挽頽風。而致隆平。竊恐中外大小臣工。日久玩
生。難保無懷詐取巧之輩。藉端干進。遇事夤緣。萬一稍

失覺察似不免為人所誤請飭下議政王軍機大臣等
各矢公忠破除情面互相勸勉宏濟時艱各部院堂官
務當振刷精神力求整頓以期上下交儆咸有一德各
等語前因升任御史徐啓文條陳時事持降旨申諭議
政王軍機大臣等毋避任事之小嫌共矢公忠之大節
中外臣工於時事闕失均宜直言無隱即議政王軍機

大臣等贊理庶務如未能盡協機宜亦當據實指陳勿
稍瞻顧此次該給事所稱王大臣等須風度嚴肅以杜
干進蚤緣等弊所奏自係防患慎微不為無見從來小
人蚤緣干進報間抵隙伎倆百出該王大臣等膺茲重
寄際此時艱固不能不下士禮賢周諮博訪惟防檢稍
疎恐轉以延攬之心致啓扳援之漸嗣後該王大臣等

尤當勉宜加勉慎之又慎寬以容衆收集益之功嚴以律身絕奔競之路交相勸勉共濟艱難如該王大臣等辦事有未盡妥洽之處仍准有言責者據實指陳其或有在外倚勢招謠之人該王大臣等所不及覺察者亦准其指名叅奏至各部院大臣同受

先朝厚恩自當激發天良力圖整頓今軍務未能盡平庶

事未見成理該大臣等務當凜遵迭次

諭旨澄叙百工經理庶務期於官不曠而事不廢無得仍

前世沓自蹈愆尤聖門言政必曰無倦王道之要尤貴有恒自古君臣未有不慎始敬終思艱圖易而能成治道者現在尤當上下交警朝夕乾惕以佐隆平之治朕實有厚望焉欽此

雙要

欽差大臣太子太保提督軍務兼理糧餉節制各鎮向為
竭誠曉諭破妖術以導民生事照得逆匪竄擾各疆
界凡我生民受其蹂躪不堪言狀本大臣前以失機
坐罪蒙恩寬赦待罪軍營繼有微勞更渥宸念破格
超拔委以兵柄本大臣斷不敢上負國恩下遺民害
滅妖氛誓不與逆匪俱生一路迎剿以來目見生靈

塗炭痛入骨髓想我居民人等受害之端皆由逆賊
佈散謠言所過之處不擾居民今我生民人等坐守
其害及至該逆賊竄過地方不論紳士舖戶人等無
不擄掠一空且想其逆匪烏合竄擾並無糧接濟該
狼飡犬噓若非民脂民膏從何處而得若此詭譎爾
等民人稍有知識不難立破妖術本大臣統帶大兵

兜剿逆匪除籌軍機之外時刻以生民為念不得不
竭誠曉諭破妖術而導生民為此沿途曉諭紳民人
等知悉本大臣為民籌劃保衛身家之策惟有鄰村
連絡毋使逆匪一名入境一村有警鳴鑼為號互相
救應遇有逆匪盡殺勿遺况大兵不日雲集諒逆匪
斷不敢全夥遠離念非零星竄擾如水之源不塞不

止爾等居民察本大臣為民設策之誠切勿畏懼視
為具文且想保衛與其坐守其擄掠孰利孰害本大
臣軍旅行營不能遍行曉諭凡有同志紳民沿路抄
貼使閭閻皆知以免坐守擾害各宜遵行毋違遺咎
切切特諭

咸豐叁年二月念一日示

二月

頌王忠丞德政四書文

好是懿德、皞皞乎不可尚已、甚矣、諸侯不仁、不保社稷、而
王子若彼者、如之何、其可及也、曰、今之從政者、視而不見、
聽而不聞、惡在其為民父母也、有人於此、以不忍人之心、
行不忍人之政、視民如傷、治天下可運於掌上、於戲、穆穆
文王、其可為至德也已矣、天時不如地利、地利不如人和、

得其民者得其心也。是以惟仁者宜在尊位，所欲與之聚之，所惡勿施爾也。如保赤子，心誠求之，此謂惟仁人為能愛人。既而曰：加之，以師旅，所惡於上，所惡於下，而謀動干戈於邦內，師行而糧食，軍旅之事，盡心焉耳矣。則又曰：因之以飢饉，千乘之邑，百乘之家，於是始興發，補不足，勞心者治人，食之以時，可以無飢矣。當是時，食之者寡，王曰：亦

運而已矣。自西自東，自南自北，則必命有司所之，以其所有，易其所無，使有菽粟如水火，故源源而來，米粟非不多也。及是時，有所不行，王曰：何為其然也？舟車所至，人力所通，則天下之商皆說，布帛長短同，五穀多寡同道，並行而不相悖，子如通之，財不可勝用也。致中和，書同文，環而攻之，無財不可以為說。王曰：無畏，散而之四方者，幾千人矣。

無他上好信則民莫敢不用情好貨財衽金革不奪不蹙
不得不可以為悅王曰可殺是不待教而誅者也不然賊
民興則民無所措手足大人者曰生財有大道以小易大
則財恒足矣或相倍蓰或相什伯小大由之與百工交易
豈曰小補之哉大人者曰水由地中行和不流則茅塞
之矣濬濟漯而注諸海排淮泗而注之江不舍晝夜與天

地同流豈無所用其心哉王知夫苗乎七八月之間旱則
苗槁矣求之有道天油然作雲沛然下雨膏澤下於民則
天下之農皆悅聖人有憂^之七八月之間雨集溝澮皆盈如
不可求下者^之巢上者為營窟民無所安禱爾於上下神
祇吾聞之也君子周急不繼富有賤丈夫焉以左右望而
罔市利當此之時朝不食不食左右手衣前後叩人之

門戶曰此惟救而恐不贖^死交物求其放心而已矣商聞
之矣謂其人曰何可當也吾止也強而後可曰不多也勉
死而已矣苟非其人以仁存心如之何諄諄然命之乎曰
為富不仁為仁不富君請擇於斯二者

